

四庫全書

集部

欽定四庫全書

梁谿集卷四十三

宋 李綱 撰

表劄奏議五

辭免兵部侍郎奏狀 論募兵劄子

論用兵劄子

御筆批答附

辭免知樞密院事劄子

辭免知樞密院事表 乞議不可割三鎮劄子

辭免兵部侍郎奏狀

宣和七年十二月二十四日
淵聖皇帝受內禪二十九日

准尚書省劄子除兵部侍郎

日下供職具奏辭免恩命

右臣被受尚書省劄子十二月二十九日三省同奉聖旨除臣兵部侍郎日下供職聞命震驚莫知所措臣竊以周建六卿司馬掌九伐之法魏分八座尚書有五兵之曹惟是貳卿實重其選况今強隣內侮邊隅動搖方艱難多事之秋陛下克篤武志張皇六師以昭藝祖之丕烈宜有英俊來應昌期如臣庸庸何足採拔雖往年論事濫得於虛名然今日建官宜收夫實效寵遇過厚

報稱誠難願寢誤恩以安愚分

論募兵劄子

宣和七年十二月二十八日延和殿賜對得旨講求募兵之策二十九日

蒙恩除兵部侍郎日下供職三十日再對延和殿進呈乞委臣相度具畫一施行

臣近蒙恩賜對便殿面奉聖訓講求募兵之策臣竊謂今日募兵訓練宜依倣周官伍兩卒旅師軍之制創作六軍每軍二萬五千人合十五萬人先會計在城畿甸禁兵數目若干諸色廂軍揀選強壯者數目若干不足則召募應逃亡軍不拘曾作盜賊有罪犯諸色人不足

則起畿甸保甲不足則起近畿州縣民兵即時團練為保仍於吏部右選召募大小使臣校尉曾應中武舉及有邊功及有方略人量材選充部轄將校近上將佐自朝廷選差其召募去處分作四項一項招揀一項刺填一項團結一項給賜利物並即時相關了當候人數足日令於京城四壁園苑內先屯逐時訓練其合用旂旂金鼓甲冑器械仗帳幕什物並計定數目分委開封府將作少府軍器監即時置造應副不旬月間可以集事

如合聖意乞委臣相度具畫一奏聞施行取進止

論用兵劄子

臣伏領御批降付臣僚所上奏劄不知何人所陳皆與
臣意暗合乃知今日不為無人在陛下採其言斷而行
之而已唐韓愈有言不赦不疑惟天子明凡此蔡功惟
斷乃成正謂此也易於謙之上六稱利用行師征邑國於
師之上六稱大君有命開國承家小人勿用蓋謙之極
非利用行師不足以濟功師之成非戒用小人不足以

保治今陛下之於金人卑辭厚幣靡不順其謙極矣然
金人驕悖愈甚其勢非用師不能有濟以臣料之不得
已而用兵其功必成然功成之後在陛下以小人為戒
而已臣愚伏望聖慈深考聖人之言斷自淵衷無為浮
議所動則大功一成中國數十年可以無憑陵之患不
然憂未艾也所降奏劄更容臣來早將上面稟聖訓謹
錄奏知

御筆

然不可輕若他先敗盟可也慎之慎之

辭免知樞密院事劄子

臣伏奉聖旨知樞密院事日下供職聞命震驚罔知所措竊以樞麻之長兼統兵機宜得瑰奇之人以居其任然後可以將率三軍之衆折衝萬里之外臣本書生進由庠序以忠義自許妄意事功而性剛才拙動輒多忤宣和初道君太上皇帝識拔執筆螭坳日侍清光屬大水暴至士庶爭具舟楫無敢言其所以然者臣謂此非

小變上疏指陳冀得直前論事當路擠排流落七載道
君太上皇憐而收之使貳奉常永惟大度之私方圖國
士之報去冬因邊吏弛備盜據全燕肆其凶虐來犯王
略太上皇厭萬幾之煩欲授聖子意有未發臣與少宰
吳敏力建大策贊成內禪歲首太上皇帝南幸江淞羣
臣亦有勸陛下為避狄之計者臣又躬述利害回鑾輿
之幸為固守之策斯皆臣子常分初無涓埃可言陛下
不以臣鄙驟加褒用擢自庶寮不五日而參大政仍委

以親征行營使事臣感陛下不世殊遇願殫犬馬之力
受任以來夙夜憂勤深恐勲績不效以負陛下知人之
明故策閱將士率勵士卒躬冒矢石登城以禦敵晝夜
巡警戢姦以安衆間遣使移檄河北諸鎮使預為隄防
忘食不寐修戰具嚴守備以俟援師援師既集欲因利
乘便進營逼虜使進不得攻退無所掠勢窮食盡渡河
而遁擊其半濟勝可萬全計慮已定而姚平仲引衆出
城幾敗大事然平仲受節制於宣撫不聞命於行營二

月一夜半平仲之出种師道亦不知之在微臣實無所與其夜四鼓陛下聞其交鋒詔臣應援頃刻之間使者三至臣適感寒伏枕力疾承命出景陽門至班荆館親督將士列在要衝分遣兵馬解范瓊王師古等圍親以中軍捍禦賊馬射殺金人甚衆是夜臣宿城下明日復列陣與賊相望臣所統兵士氣百倍然臣其晚求對不可已而賜醴恐懼自省莫測其原仰賴陛下至仁至聖灼見臣愚款實無他腸特賜宸翰許之保全與其空

乏加賜纁金未逾三宿亟垂召命俾還舊物詔臣速為
守禦之事諭以怨仇嫌謗欲持平仲之罪中傷微臣伏
惟陛下天地父母覆幬生成之恩不可為量瞻謝之際
感涕交集德施罔極捐軀弗避惟是都城細民因間殺
掠內侍理宜彈壓臣躬稟聖旨即取其最不逞者斬數
十人梟首通衢以靖羣衆重沐聖恩令臣知樞密院事
竊惟和議既成金人擁重貲邀名鎮不戰而得所欲臣
誠私心痛之既乖臣本志兼統軍事豈其所宜祖宗舊

法兵符出於密院而不得統其衆兵衆隸于三衙而不得專其制今臣既統行營之兵又制樞密之令考之舊法未見其可臣竊謂羯寇初退四方勤王之師未有所屬中都畿邑團結保甲之兵未有所處欲於旬日之間犒賞條具以勤王之師盡附制置使姚古种師中使司牧圉以團練保甲分還州縣使各樂業内外人心既以牧寧臣當抗章自陳請辟賢路以遠讒謗全陛下始終之恩此心素定有如皦日昔張良作漢腹心高祖數罹

困阨良常有力乃顧從赤松子遊李泌入議唐事肅宗
復兩京泌謀居多乃欲隱衡山此皆豪傑邁往之士乘
時遇主以成功業久安顯位何所不可而屏門以避患
禍猶至於此況臣單立一身朝無親黨乏昔人之功業
而有不貲之讒謗豈得安處寵榮不知戒懼今縱內外
粗安未敢亟去若叨冒巍莪進長樞庭非所宜據固當
懇辭得請而後已伏望聖慈察臣至誠出於至切非敢
矯飾務為虛文特降睿旨追寢隆恩以安愚分不勝大

顧

辭免知樞密院事表

臣言伏奉制命除臣知樞密院事尋具劄子辭免蒙降
詔不允者武有七德宜恢經遠之規望臨一時乃副由
中之命豈材慙於柱石亦位長於樞衡輒恃至慈求安
微分中謝伏念臣資性淺窳學術迂疎常自信其樸忠
頗著聞於狂直思忘身而洵國慕以道而事君抗章隔
左史之班折而焉撓趣召貳奉常之職知無弗為偶羯

寇之負盟連叛臣以犯順吞噬幽薊蹈藉河山方國家
有警之時正臣子竭誠之際上皇順天心而授聖子克
成堯舜之仁陛下因民欲以保神京更邁宣光之業豈
係人力實賴天功而臣叨擢任於肅機仍倚充於元帥
受恩至渥懷報靡遑選練六師每揚聲於出戰嚴飭百
雉專悉力以登陴克張羆虎之雄昭示金湯之固火逼
甘泉而不恐騎至渭水以何虞俟集援師式遵廟算猛
將輻湊各喋血乘勝之有聞壯士雲屯皆投石超距而

可用欲連營而並進擬堅壁以相持使其形勢衰疲糧
食空乏指歸路而棄甲視洪流以爭舟斯奮擊而無亡
矢遺鏃之勞爰邀截而絕足馬踦輪之返重幣復得如
荀息奉璧之奇貴質來歸笑知瑩真楮之陋惜貪夫之
妄作悵幽然而失圖端賴英明亟加延見察兵端之動微
臣初不預知宣獨斷之威衆讒真莫能蔽增領備禦之
政俾兼宥密之謀鑒照若茲捐糜罔避然孤危之跡僅
免謗傷而狡獪之謀既從和議驚魂未定施表餌以何

堪素志不伸覽韜鈴而有愧行即引去尚留須臾將分
布勤王之人且區處復業之衆回道君清輝於淮浙遂
天子崇養於晨昏彗掃星流畫久逸永寧之至計天開
地闢應中興重歡之美談然後請辭寵榮務遠權勢學
道輕舉追辟穀之張良放意收身效看山之裴度庶全
終始或解怨仇儻冒居右府之先慮莫保畏途之戒伏
望皇帝陛下審易盈之量慎難進之風曲回渙文矜存
確素恐至於惑譬若載驪以車賞不敢當願復屠羊之

肆


乞議不可割三鎮劄子

臣契勘昨任太常少卿日於去年十二月二十八日上
殿劄子論事內一項言金國遣使有所邀求其他可從
唯求割河北之地雖尺寸不可許但當答以祖宗境土
為人子孫當固守之且河北燕山接境有塘泊以為固
今割以與之則險阻之地盡在彼疆何以立國當擇使
往以死爭之其後金人犯關遣使議和李稅鄭望之等

實任其事而金人所須欲以親王宰相為質還歸朝人
割三鎮地多索金銀物帛之數臣與李邦彥廷爭以為
宰相當往而親王不可往歸朝官當與而三鎮之地不
可與金銀物帛之數當量力與之不然後且有悔當時
議論與羣臣不合因再拜丐罷蒙陛下厚恩撫慰再三
俾專治兵方時艱難不敢力請至於誓書之類並不與
聞然猶力留三鎮之詔以待勤王之師俟其大集因欲
以將帥之意檄軍前以改誓書既而姚平仲妄作小劄

臣亦罷黜而三鎮之詔遂行方今金人退師已遠挾質
以往必期於得地而後已如三鎮果下則異時河北河
東必不能守密邇畿甸宗社可憂萬一三鎮固守不下
彼必挾親王以行陛下手足之愛何以為懷由是觀之
當時計議奉使之臣得不深罪自金人渡河後數日方
遣兵防屯不復尾擊蓋以親王之故然而金人本約親
王至河而返今已爽約又沿路屠戮橫屍滿野則和議
明約已不可守異時既得三鎮別求釁端不旬日而至

城下其患豈淺淺哉今雖遣姚古种師中渡河為三鎮
聲援然相去金人二十餘程緩不及事臣恐三鎮人心
動搖或不能守將來建置帥府與之對壘當於何郡控
扼防托當以何兵蓄聚糧草當以何法遣將命帥當以
何人此四者皆不可不預為之隄防臣昨已嘗具劄子
乞令遣計議之臣措畫未蒙施行當今急務無大於此
願下臣章令在廷之臣集議擇其所長而行之天下不
勝幸甚



梁谿集卷四十三

欽定四庫全書

集部

梁谿集卷四十四至七

詳校官庶吉士_臣張溥

侍讀_臣孫球覆勘

總校官知縣_臣楊懋珩

校對官編修_臣王天祿

謄錄監生_臣陶紹侃

欽定四庫全書

梁谿集卷四十四

宋 李綱 撰

表劄奏議六

起居道君太上皇帝表

上道君太上皇帝劄子

具奏到陳留縣接見道君太上皇后劄子

進呈道君太上皇帝劄子

第二劄子

奏知朝見道君太上皇帝劄子

乞納玉帶劄子

御批答附後

奏道君太上皇帝劄子

起居道君太上皇帝表

臣某言戎輅履險罔陪扈從之勤我師指期行致蕩攘之效敢具陳其悃輒躬問於起居中謝伏念臣忝自單平驟膺獎擢屬獫狁之入寇連叛將以俱來曾是微才猥當任責臣於正月四日自兵部侍郎蒙恩除尚書

石承奉聖旨差充親征行營使既與聞於機政仍兼總
於兵權竊慕謝安之靖貳羌欲追崔浩之破毛國練兵
選將遠揚出戰之聲登城守陴密為堅壁之說器械盛
設樓櫓畢施金人於七日夜攻雲澤門次攻通天安泰
等門縛筏渡濠持弓張弩雨兵紛集難越高墉雲梯以
登悉皆摧裂遂斂衆以却退因遣使以請和主上重惜
生靈深存國體已曲從於好約復更定於誓言捐帑藏
之貨財遣信使而歷陣彼歸待命兵戢有時然不備不

虞昔賢之所戒受降受敵前史以為難臣謹張皇軍容
申飭守備提師深入知黠虜之無謀募兵鼎來喜王師
之益衆士民生氣宗社必安恭惟道君皇帝睿知如神
高明合道下渙詔以恤民隱德已洽於衆心授聖子以
固皇基意實通於穹昊臣伏承陛下儲精淵默養志宴
閒從容吳越之奧區觀覽江山之勝境俟四方之無侮
表二聖之重歡誓竭駕軀少伸毫髮鳴鑾禹穴遙瞻方
外之游問寢龍樓佇承天下之養

上道君太上皇帝劄子

臣聞南之與北相為盛衰非徒人為殆亦天數一昨金人緣藥師叛既陷燕山寢窺河北城壘相望而無藩籬之固牧守相視而無封疆之臣老將持兵望風先潰大河解凍乘桴競浮駿騎長驅於中原勁兵直指於魏闕以正月初七日迫邇都城劫掠士民焚蕩廬舍以大火船鐵騎攻水西門守衛之具辦於倉卒臣奉皇帝旨率勵將士誓以死守設械拒於汴流之中殺獲數千人迨

曉方息復以銳兵攻酸棗門一帶驍勇之衆蜂屯蟻附渡壕臨城梯長如雲箭落如雨天地改色風沙晝昏人心震驚宗社危急臣奉皇帝旨將諸班直弓弩手救援躬冒矢石以摧其鋒令敢死士焚契雲梯殺獲首領一人攻破其黨獲級甚衆賊兵乘棧以強弩射之往往沒溺障汴河水令歸城壕水勢漲溢自卯及午賊兵方退却知我城中有儲始遣使人同李鄴等計議臣等糾集將士欲以死戰皇帝以宗社生靈之故務令持重始議

通和使者旁午冠蓋相望累日而後議成皇帝聖德格
於曠古變鴟鴞為好音化虎狼為善類不愛金幣務保
要害之地遂遣康王張邦昌使軍前悉如所請彼方退
舍竢犒師之物以歸然邀求數多殫竭帑藏空匱民力
不足以給之敵情難窺尤當預防臣見修治守禦之具
訓練出戰之兵使彼蠲減所須之數果如期而退夫復
何言萬一有跋扈之憑陵欲危宗社臣等當陳師鞠旅
以圖進師神人共憤天必助之恭惟道君太上皇帝祇

通神考以文繼武天下稱其孝傳位聖子法堯禪舜
天下稱其高翠華南幸臣拘以職守不敢負羈紲以從
艱難之秋冒處政機誓將肅清畿甸奉迎鑾輿矢心已
明殞首何恨

具奏到陳留見道君太上皇帝劄子

靖康九年三月十六日得

旨前去南京奉迎道君太上皇帝十七日行次
陳留縣遇道君太上皇后船登舟奏事以事節
并所得語言
具劄子奏知

臣舟行離陳留縣三十五里遇道君太上皇后船臣同

黃經臣於岸上起居訖蒙傳教旨勞問臣託內侍官李
修等奏稟乞依趙野例至幄次前奏事奉教旨允臣即
時登舟於簾前叙致訖拜具道陛下聖孝思慕之意及
道君太上皇后平時保護之德蒙問朝廷欲使於何處
居止臣對以見遵奉道君太上皇帝聖旨指揮建櫨景
園為寧德宮時暫居止他日須於龍德宮側別建宮室
方協典禮又蒙問時暫居禁中有何不可臣對以天下
大義惟禮與情情欲其通而禮所以節文之以皇帝聖

孝殷下聖慈母子之情豈復有間但有司議禮以為稽之三從之義道君太上皇帝居龍德宮未到闕間殿下欲以居禁中於禮未合恐非所以副天下之望蒙諭朝廷須是措置教是則得臣對以朝廷如此措置但欲協典禮順人情以副天下之望兩宮安則宗社天下安矣既退臣復召提舉人船內侍官李修等三人委曲諭以前說及天下大義皆以為然又蒙太上皇后賜食賜茶及賜一行官吏錢五百貫文遣李修諭臣既居寧德宮

後欲一到禁中瞻拜神御可否何如臣對以殿下既居
寧德宮皇帝自當時往省問如欲暫到禁中有何不可
既而解船臣步即前路奉辭訖依稟聖旨迤邐前去迎
奉道君太上皇帝臣竊謂太上皇后已有許居寧德宮
之意更望聖慈曲全孝道不須過有疑慮如不許使臣
人從入皇城之類似不須如此乞與宰執問議使情無
間阻別致生事為宗社生靈無疆之福臣不勝虔禱之
至

進呈道君太上皇帝劄子

靖康元年三月二十日到南京二十一日朝見

道君太上皇帝賜對

惺殿具劄子進呈

臣伏念自為布衣諸生即荷陛下教養叨塵科第實被
異恩荐歷清華皆出親擢每思奮勵少答殊恩去歲蒙
恩召還適遭寇戎犯闕遠邇震驚臣蒙今上皇帝委任
於倉卒擾攘之際躬率將士以死捍賊所幸堅城可守
援師漸集賊因悔禍而去此則上天垂祐宗廟社稷無
疆之休也顧臣綿力薄材沮于羣議不能蕩馘醜虜以

攄憤慙忝冒政府以懼以慚方今鑾輿旋軫二聖重歡
稽之古今誠為稀有臣之區區志願粗畢已累具奏只
候迎奉還闕乞身東歸安養疲耗伏望道君太上皇帝
聖慈憐念舊物曲賜保全使獲退休里閭則終始仰荷
天地大德非臣糜捐所能報稱

第二劄子

臣伏以鑾輿南幸未數日間賊遽犯闕閉守捍禦者四
十餘日方圍城之中今上皇帝瞻慕慈顏言輒涕下唯

冀事定早獲奉迎還宮今幸賊已遠去中外寧謐翠華
天旋將次畿甸宗室戚里父老民庶出宿政望已逾旬
日伏望聖慈早戒徒御言歸都城上以副皇帝孝思欲
養之心下以慰臣子夙夜祈嚮之意天下不勝幸甚

奏知朝見道君太上皇帝劄子

靖康元年三月二十一日到南京朝

見二十三日朝辭先以事節及所得聖語具劄子奏知

臣舟行二十日晚至南京詣道君太上皇帝行宮得旨
令來日見二十二日早賜對幄殿首問臣離闕日皇帝

聖躬萬福臣對以陛下聖孝思慕欲養之意數十言道
君淚下稱皇帝仁孝四海皆知凡數十言次問臣賊馬
到城下守禦次第臣以實奏知道君宣諭此中一一具
知臣進劄子二紙其一乞鑾輿早還蒙道君宣諭本欲
往亳州太清宮以道路阻水不果又欲居西洛以皇帝
懇請之勤已降指揮更不戒行其一叙臣往蒙道君知
遇及蒙陛下委任方艱難時得効犬馬之力只候迎奉
還宮二聖重歡臣得乞身之意蒙道君撫勞再四及稱

陛下書中褒獎之詔面賜臣玉帶一條并金魚袋令臣
即時繫服又言行宮人皆喜公來且以此安慰其心臣
拜謝訖退蒙遣使臣賜臣酒菓香藥等是日本欲詣天
慶觀鴻慶宮神霄宮燒香聞臣催促奉迎禁衛儀物等
將到遂展一日仍有旨令臣扈從二十二日早道君令
蔡攸鄭詳凡三次諭及稱七寶輦皇帝未曾御禮數太
過欲只乘簷子如何臣對以陛下出自聖意專以此奉
迎道君願乘御使南都士民聳觀盛事是日臣同趙野

宇文粹中蔡攸等扈從三處燒香觀者如堵莫不感悅
既歸行宮召臣對便殿具道所以內禪之意並出親書
青詞草令臣齋示宰執等及言前日措置未當數事臣
逐一解釋道君宣諭此等皆末事但勿為形迹使四海
觀看不好即得臣對以陛下聖孝欲極四海之奉以養
道君皇帝倉卒擾攘之中朝廷有司措置施行或有未
至願以保全宗社大計為念細故不足深責陛下惟恐
少有不當道君意者日夕憂慮至於全不進膳願有以

慰安之以副天下之望道君諭臣言尋常只為性快有
此小事只欲說破便無事公盡見此中底裏來早辭畢
先歸達此意慰安皇帝因袖中出書付臣仍謂臣曰公
輔助皇帝捍賊守宗社有大功若能調和父子間使無
疑阻當書名青史垂之萬世臣感泣再拜受命又出小
字書數事令臣奏知皆微末易從之事容臣到闕日面
奏今具合奏知事如右

乞納玉帶劄子

臣比者奉迎蒙道君太上皇帝以陛下過有褒獎之語
形於書問特賜臣玉帶古簡恩禮隆厚實非微臣所可
克當但以上皇宣諭再三而臣之此行正欲調和兩宮
使無疑阻不敢不受昨日奏對已嘗具劄子乞行繳進
并賜銀絹等不曾請受乞納左藏庫以助軍費伏蒙聖
恩不允所請臣雖已拜命退竊維念以無功而享厚賜
實所難當伏望聖慈許依前劄所請特令繳納以安愚
分取進止

御筆

所乞不允可便收邊事方急求日留身面奏

奏道君太上皇帝劄子

道君行至拱州降賜御筆令奏稟欲留內侍馮彥等

事具劄子奏知

臣伏奉道君太上皇帝特賜御筆恭審鑒興已次拱輔
即日季春極暄聖躬萬福臣子之情不勝感抃但恩禮
過當非所敢承宣任惶懼伏奉處分令具奏使臣馮彥
等事臣今早入對已即時奏聞得旨專遣中使致書問

聖意所欲留者當稟聖訓然臣見以憂虞之餘心力凋
耗已入劄子乞罷知樞密事外任宮祠恐不獲前路迎
候無任瞻天仰聖激切屏營之至

梁谿集卷四十四

欽定四庫全書

梁谿集卷四十五

宋 李綱 撰

表劄奏議五

附御筆批荅

乞罷知樞密院事除外任宮觀劄子

第二劄子

第三劄子

乞免赴祥曦殿從駕劄子

第四劄子

第五劄子

繳進第五次乞罷文字劄子

親筆宣諭赴院供職 親筆手詔

謝乞出不允降 親筆手詔表

乞罷知樞密院事除外任宮觀劄子

靖康元年三月道君

太上皇帝將還京師上御延和殿議奉迎之禮耿南仲出劄子乞盡屏道君左右內侍等不許至奉迎行宮輒入者斬公謂不必如此但遵常法足矣語頗侵之及再對睿思殿南仲遂訐伏闕事乞付御史臺根治公上劄乞罷

臣聞見危致命臣子之常分陳力就列古人之格言方

艱難之時固當徇國忘軀而至於揣分量才又有不能
則止之義輒申愚懇上瀆天聽伏念臣賦性蠢愚問學
荒淺比由庶僚荷陛下異恩擢在政府自蒙委任夙夜
究心外捍彊敵內安衆志上賴宗廟社稷之靈陛下仁
聖所格醜類退師京邑寧謚傳檄而三鎮堅守奏使而
兩宮協和區區之忠志願粗畢而臣自事變以來夜以
繼日無時暫休智術殫於思慮意氣索於憂虞內揆涼
薄實難勉強况今朝登老成賢智并用正論得伸於廟

堂德意下洽於海寓自此天下豪傑忠智之士當茹連
而進內修政事外復境土以副陛下嘗膽願治之意願
如臣者材術既疎心慮憤耗深恐有誤使令以速罪戾
伏望聖慈許罷臣知樞密院事特除一在外宮觀任便
居住則仰荷陛下始終保全之恩捐軀報國期於異日
干冒天威無任戰汗之至取進止

御筆

今封還御奏豈可如此朕委付之意至矣更勿少

疑不得再請雖累百章亦當封還付李綱

第二劄子

臣適具奏以備經憂虞心慮憤耗乞罷知樞密院事除
一在外宮觀差遣伏蒙聖慈特降中使封回所奏章御
批訓諭令不得再請聖意隆厚感戴天恩非臣糜捐所
能上報竊念臣奮自寒苦初無所長遭遇陛下龍飛之
初適丁艱難國家多事蒙被獎擢得以見危致命少效
臣節都邑底寧昆夷息喙斯皆陛下盛德所致如臣何

力之有然而孤危之跡踈拙寡助力小任大夙夜憂恐
自非陛下深察而保全之寧有令日常願戎馬既退三
鎮保全上皇鑾輿還闕二聖重歡目覩盛事乞身歸休
安於田畝乃其素志適今早進對與大臣議論不合遂
詆臣以士庶伏闕之事是臣結構至欲送御史臺根治
伏念臣備位樞筦橫遭誣讟有玷國體寧不痛心所以
遽上封章實非獲已雖蒙聖恩委曲宣諭終不自安伏
冀哀憐使遂所請未填溝壑誓當捐軀以圖仰報臣更

不敢供職見般出啟聖院安泊聽候指揮取進止

御筆

依已降旨不許般出啟聖院依舊赴院供職

第三劄子

臣伏蒙陛下以臣上第二劄子乞在外宮祠特降御批
令臣依已降旨赴院供職仰荷聖恩彌深感戴臣聞難
進易退者君子之風貪位慕祿者人臣之戒臣自庶僚
荷陛下特達之知擢參大政遂長樞庭所以輒受而不

敢固辭者蓋以方時艱難義當自竭雖叨冒非據不自知其不可然於君子難進之義已不能無愧今日戎馬既還國勢粗定庶幾易退以補前愆至於貪位慕祿則非臣之素志也况因廷對同列議論偶有不合遂遭詆誣包羞忍耻強顏取容不惟有玷國體亦將取輕於陛下其何以協贊帷幄之謀折衝萬里故敢仰恃天恩乞身而退庶幾去就之節尚無愧於古人伏望聖慈憐臣區區非敢沽激特從所請勿使顛隳荷恩無窮沒齒難

報見今已在啟聖院聽候指揮取進止

御筆

可赴院供職不得再有陳請今封還卿奏

乞免赴祥曦殿從駕劄子

臣伏蒙陛下特遣中使宣押赴祥曦殿起居從駕臣已具劄子乞在外宮祠及夜來傷風頭目昏眩今來從駕詣寧德宮所有隨班起居從駕難以趲赴伏望聖慈特賜蠲免謹具奏知

御筆

體前後累降旨揮速出供職雖上百章亦當封還

第四劄子

臣累具劄子乞一外任宮祠未蒙俞允今早御藥梁方平等宣押赴祥曦殿起居從駕至寧德宮臣不敢不遵稟聖訓然而臣於進退之義有不得已者方欲再具劄子上冒天聽伏蒙聖慈特降御批促令供職仰荷厚恩非臣殞首所能報稱臣聞匹夫不可奪志也臣區區之

志本欲只俟邊境稍寧國勢安定上皇還宮即丐補外
已嘗具奏知非緣昨日與大臣議論不協之故因事輒
發伏望睿慈察臣忱誠特從所乞雖在田里敢忘大恩臣
不勝祈懇之至謹四具劄子奏知取進止

御筆

不允仍依累降旨揮勿更有請

第五劄子

臣已四具劄子乞在外宮祠伏蒙聖慈批答不允仍降

旨揮諸處不得收接文字仰蒙知遇之意所當上稟聖訓不復有所陳然事有不得不自明者敢冒斧鉞之威仰祈天鑒臣前日延和殿奏對因與耿南仲辨論臣以謂天下之理明則誠誠則明自明與誠推之可以至堯舜閭則疑疑則闇自闇與疑推之其禍有不可勝言者南仲當以堯舜之道輔陛下而其人闇而多疑其言有不足深採臣當時止緣國事出語激切實無他腸不謂南仲銜臣當語及再對睿思殿忽言臣與姚平仲結連

二月一日劫塞并言初五日士庶伏闕係陳公輔首先率衆并有使臣數人在其中鼓唱作亂今公輔不可爲司諫乞付御史臺根治其意專以詆臣蒙陛下委曲宣諭南仲奏陳不已稱若不付御史臺則罷陳公輔不然則臣當乞去無可留之理臣契勘昨來西師既到臣與將帥實謀用兵嘗於榻前議論八事謂如扼河津禁抄掠以困金人以將帥之意移檄軍前復歸三鎮當時吳敏种師道等同對實聞其事至初一日姚平仲妄舉臣

未嘗與知是夕止緣三奉御劄力疾出封丘門前去策應而外庭至今猶以為平仲之舉臣實使之且平仲係受宣撫司節制雖种師道猶不與聞在臣行營司初無統攝安得而與縱使與聞止緣國事豈有它故而南仲舉以為罪何也臣既罷之後般出浴室院謝絕賓客皇懼待罪間忽蒙陛下遣中使宣召始知有士庶伏闕之事方擾攘中蒙陛下委任撫諭彈壓辭不獲命至斬決數十人數日而後定臣之區區諒蒙聖察而南仲指陳

公輔專以詆臣何也且陳公輔與臣初昧平生當日在與不在伏闕之中臣不得而知也若南仲果識公輔知其首謀當時誠以為非自合即時奏劾豈容今日乃始因事上陳兼公輔之為諫臣非臣薦引亦初不與南仲而南仲欲以為去就何也臣以謂今日朝廷方禍亂救寧之初正當以別白是非為先廟堂之上是非不明何況天下若以南仲之言為是朝廷自當付之有司根治黨與誠果有之臣首當在誅夷之列若以南仲之言為

非則當明告中外洞然曉知使臣不受黯闇之謗臣之
於此豈得不辨必若朝廷重惜大體欲兩全之莫如與
臣一宮祠使歸田里則仰荷陛下生成覆載之恩終始
待遇之賜異時圖報捐軀有日伏望聖慈特允所請取
進止

御筆

不允所乞今封還卿奏勿復有請

繳進第五次乞罷文字劄子

臣前者累具劄子乞在外宮祠初二日蒙遣中使宣押赴福寧殿賜對臣嘗面奏第五劄子伏蒙陛下再三宣諭還所上章仍命中使押赴樞密院供職臣不敢不遵稟聖訓即曾具奏俟奉迎畢日當伸前請今上皇還宮既已累日聖孝所格中外鼓舞今早又獲扈從問安龍德宮目覩盛事可謂幸會而臣以憂虞憤耗之餘被巧詆難明之謗尚冀聖度保全得請骸骨伏望天慈許臣所乞所有前日進呈劄子謹再具繳進冒瀆天威無任

惶懼待罪之至

御筆

依累降旨不允所乞

親筆宣諭赴院供職

卿忠義之志朕所素知方國家多艱實賴共濟更
不得有請便赴院供職付李綱

親筆手詔

卿累貢封章懇求去位自陳危懇甚駭予聞迺者

寇在近郊士庶伏闕一朝倉猝衆數十萬忠憤所
激不謀同辭此豈人力也哉不悅者造言何所不
可故卿不自安殊不知朕深諒卿之不預知也前
日宰執臺諫沮師敗謀格塞公議已悉罷逐方今
四海所願以為輔佐多聚廟堂朕於任賢勿貳去
邪勿疑自以為庶幾焉卿其深體朕心亟安厥位
以濟國事付李綱

謝乞出不允降親筆手詔表

臣綱知伏蒙聖慈以臣累具劄子乞外任宮祠特降親筆手詔曲加撫諭令安厥位以濟國事者冒貢忱辭方懼雷霆之震特頒溫詔遽窺雲漢之章既辨明其謗言又勉勵以國事恩隆命薄感極涕零

中謝

伏念臣結約

亡竒迂愚有素幸邁雲龍之會獲施犬馬之勞受知既越於常倫得謗遂生於意外儻非上智曷諒微忠伏蒙皇帝陛下燭以天光形於奎畫安危疑之孤踪洗黯闇之厚誣遂中山之功豈曰樂羊之力辨博陸之譖實由

漢帝之明臣敢不仰體眷懷勉安職守修政事而恢境
土方祇奉於睿謨捐軀命以徇國家誓力酬於大造

梁谿集卷四十五

欽定四庫全書

梁谿集卷四十六

宋 李綱 撰

表劄奏議八

論守禦劄子

進備邊禦敵八事

乞修塘濼劄子

乞修邊備添置參謀編修官劄子

乞措置三鎮劄子

御筆批
答附

辭免轉太中大夫表

再乞罷知樞密院事守本官致仕劄子

第二劄子

御筆批
答附

第三劄子

御筆批
答附

三乞罷知樞密院事劄子

御筆批
答附

第二劄子

御筆批
答附

論守禦劄子

敵騎出境乞用富弼守禦一策分
兵控扼要害之地具劄子進呈

臣竊觀自秦漢以來制禦戎狄未有得上策者惟本朝
與契丹為澶淵之盟守之以信結之以恩百有餘年邊

境晏安兵革不用和好之篤古所未有然而所以制禦之術曷嘗一日弛備耶財用充足糧儲有餘士馬精研將帥用命則彼雖欲窺邊徼而封疆無隙可投欲不守盟何可得也臣伏見仁祖時富弼所上守禦二策審地形觀事機分兵控扼要害之地左右出入縱橫應援曲盡其妙然以謂非三十萬衆不可則知制勝之術在於足兵與王翦之伐荆必六十萬而後行其理一也臣愚以謂今日防秋正宜用弼之說度時之宜良將勁卒外

布邊境重兵大帥雄扼諸鎮使賊不敢有覬覦之心萬
一奔衝可以制其死命誠奇策也所有富弼守禦策二
篇謹具繳進伏望聖慈特賜省鑒採其說而用之取進
止

備邊禦敵八事

三鎮官吏軍民為朝廷堅守公
奏宜飭武備修邊防條具八事

以進

一唐之藩鎮所以拱衛京師故雖屢有變故卒賴其
力而及其弊也有尾大不掉之患祖宗監之銷藩

鎮之權罷世襲之制施於承平邊備無事之世越
在今日則手足不足以為捍頭目為今之計莫若
以太原真定中山河間建為藩鎮擇帥付之許之
世襲收租賦以養將士習戰陣相為唇齒以捍金
人可無深入之患又滄州與營平相直隔黃河下
流及小海其勢易以侵犯宜分濱隸德博建橫海
軍一道如諸鎮之制則帝都有藩籬之固矣

一自熙豐以來籍河北保甲凡五十餘萬河東保甲

凡二十餘萬比年以來不復閱習又經燕山雲中之役調發科率逃亡流移散為盜賊今所存者猶及其半宜專遣使團結訓練令各置器甲官為收掌用印給之蠲免租賦以償其直武藝精者次第遷補或命之官以激勸之彼既自保鄉里親戚墳墓必無逃逸又平時無養兵之費有事無調發之勞此最策之得者

一自祖宗以來養馬於監擇陝西河東河北美水草

高涼之地處之凡三十六所比年廢罷殆盡而更
為給地牧馬民間雜養以充數官吏便文以塞責
而馬無復有善者又驅之燕山悉為敵人所得今
諸軍闕馬者大半宜復祖宗監牧之制權時之宜
括天下馬量給其直則不旬月間數萬之馬可具
也

一河北塘灤東距海西抵廣信安肅深不可涉淺不
可以行舟所以限隔胡騎為險固之地而比年以

來淤澱乾涸不復開浚官司利於稻田往往洩去
積水隄防弛壞又自安肅廣信以抵西山地形低
下處可益增廣其高仰處即開乾壕及陷馬坑之
類宜專遣使以督治之

一河北河東州縣城池類多隕圯埋塞宜徧行修治
而近京四輔郡諸畿邑皆當築城創置樓櫓之屬
使官吏兵民有所恃而安萬一有賊騎深入虜掠
無所得可以坐困

一河北河東州縣經賊馬殘破蹂踐去處宜優免租賦以賑卹之往年方臘擾浙東猶免三年今三鎮之民為朝廷固守安可不議所以大慰其心者

一河北河東諸州最以儲峙糴買糧草為急務宜復祖宗加擡糧草鈔法一切以見緡走商賈而實塞下使沿邊諸郡積蓄豐衍則寇不敢動矣

一陝西解鹽無煮海之勞而給邊費足民食其利不貲自行東南鹽法而解鹽地分益狹西邊益貧願

復祖宗舊制以慰關陝兵民之心

乞修塘灤劄子

敵騎既退乞同李邈措置塘灤城堡水櫃等事具劄子進呈

臣伏覩种師道詹度等奏金人馬已出塞垣朔方保全宗社大慶然彼但以河間中山兩路州軍堅守之故且懼王師之襲不得不遁其意豈嘗一日忘割地之約耶深慮秋冬之交弓勁馬肥復犯邊徼捍禦之策所當預修契勘安肅廣信平等軍東有塘灤西抵太行中間坦塗不過三百餘里塘灤既可增廣其他地勢雖頗高

仰亦因高就下限以長堤瀦蓄水櫃以為阻固如水櫃
不及之處自宜修築城堡屯兵控扼或設塹甯以虞奔
衝茲事體大非藉能臣未易辦集竊見樞密副都承旨
李邈累任河北邊郡風績素著深究邊防利害欲乞特
建一司以邈充使專切措置塘灤城堡水櫃等仍乞朝
廷多方應副庶幾克成大功以為永遠之利

乞修邊備添置叅謀編修官劄子

臣竊惟軍政之不修二十餘年於此矣將驕卒惰賞罰

無章每戰輒北兵既寡弱民又凋弊敵人由此敢肆憑陵中國之不振未有勝於此時者也今賊雖退師尚未出塞所至剽掠無復顧憚蓋由初未嘗有所懲創時方向暑須暫遠去秋涼馬健何憚而不來此其可慮又非前日可比謂宜及今速為之備一曰選將二曰募兵三曰訓練四曰保甲五曰馬政六曰繕器甲七曰峙糧草八曰修城壁九曰增塘濬十曰置堡塞凡此皆軍政之大者當今之急務也而其財用調度之費不與焉前此

賊未退師支梧目前固有未暇今度其勢出塞決在旬日而此去防秋近在三數月間要當自茲講求施行不可復緩又況西戎跳梁五路並入四夷交侵誠可深慮臣以書生備位樞筦方艱難乏使之時乞避賢路不蒙賜許夙夜思之國之大事無過於此誠非一介孤陋所能獨任要當合衆志協衆力上稽祖宗之舊下考當今之宜庶幾有濟欲望聖慈許臣辟置叅謀官四員於職事官中不拘官資高下兼充仍添置編修官二員同共

措畫條具以時推行如蒙允許容臣續具姓名以聞

御筆

依奏參謀編修添置四員

乞措置三鎮劄子

臣朴野無所取材自蒙陛下委任力守三鎮不可割之
議區區赤心始終一節不顧謗尤者誠謂祖宗土地雖
尺寸難以與人儻必割之無以立國冒瀆聖聰者熟矣
臣累次面奉聖訓候金人過河別行遣使計議三鎮之

地今來計程已是渡河之日所有三鎮合行計議乞降
御前文字付臣因控扼河津兵行選使同共前去取進
止

御筆

三省密院同共詳議莫更卑辭遣使求之見親王隨
行不可輕易繫國安危

辭免轉太中大夫表

臣某言近具劄子辭免卑恩轉官伏蒙聖慈降詔不允

者出震膺圖咸慶風雲之會乘龍施澤敢懷雨露之私
存貢忱辭冀回淵聽竊以厯數蓋歸於天命謳歌允協
於民心大寶既臨羣工受祉如臣者以身許國初何意
於陞遷叨位本兵顧已踰於涯分更容貪冒徒速顛隳
伏望皇帝陛下俯徇至公曲從素願惜名器之重爵尊
朝廷行貴近之先化成海寓俾能無愧實預有榮所有
告命未敢祇受

再乞罷知樞密院守本官致仕劄子

靖康元年
五月守禦

使司補進武副尉二人以齎御前蠟書間道至太原賞之補訖奏知上批有大臣專權浸不可長之語上劉子乞罷

臣前日伏覩宸翰守禦使司轉資奏行批知大臣專權浸不可長聖恩隆厚未賜誅殛伏讀以還不勝皇懼臣伏念昨者金人乘虛直犯城闕臣以菲材猥當任重伏蒙聖恩許以便宜從事有功則賞有罪則誅訖以上聞蓋稟睿旨旬月以來國勢粗定屢曾面奏乞罷守禦使司未奉俞允而邊陲之間賊馬屯泊間道通信欲及機會

非假賞典不能使人故如奏行轉資之事往往尚仍前
日此乃以守禦使司未罷之故非臣敢創為此也兼臣
契勘置司之日蒙陛下頒降空名官告綾紙凡三千道
若以委任之專凡此所降告身皆可盡用而置司以來
前後書填只用三十一道而已自非灼然委有績效之
人不敢妄與今宸翰以為專權竊恐聖意有所未亮也
臣聞衆嘯漂山聚蚊成雷臣之孤忠困於無助爰自遭
遇未逾歲月而幾於危殆者屢矣仰賴聖明洞照愚悃

故敢尚此黽勉以圖報效而浸潤日聞聖聽已惑臣之
微軀寧復自保夫專權者臣子之大戒而人主之所甚
惡也臣雖至愚何敢當此重念臣竭忠報國非敢愛身
然竊以謂任則當勿疑疑則當勿任唯疑與任不可並
行今陛下旣已疑之矣豈可復處臣以樞機之任況臣
自此日以來憂悸成疾心力耗盡動輒遺忘深恐有誤
國事伏望聖慈許臣守本官致仕得避賢路乞此骸骨
歸安田廬伏惟陛下天地父母哀而憐之始終保全勿

使顛沛則臣感戴天恩期於結草臣無任

御筆

前日所批止係要依祖宗故事無纖芥之疑卿但安
職所乞不允仍不得再有章奏

第二劄子

臣伏蒙聖慈特降中使宣押臣赴樞密院供職及家屬
歸府第仰荷天恩第深感戴竊念臣偶以冗材濫膺重
任初乏涓埃之補自貽專輒之愆大度兼容未加譴責

何施面目復冒寵榮伏望陛下終始哀憐曲垂保庇特
依所乞許臣守本官致仕使與田夫野老共祝堯年非
徒危疑之跡可以少安亦使進退之間不累國體臣已
見出門外聽候指揮所有不候奏知出門之罪伏重賜
黜責施行

御筆

所乞不允已差御藥宣押可赴院供職

第三劄子

臣伏蒙聖慈以臣上第二劄子乞守本官致仕特降御批令臣赴院供職不得更有辭免仰荷德恩彌增感懼臣竊以樞筦之任號為本兵况當艱難之秋可見委寄之重自非信臣曷可冒處而臣稟性蠢愚濫被眷獎無涓埃之小補有譏謗之並興至煩宸章宣示三省怨怒傳播喧於外廷臣獨何顏復居密宥之地伏望陛下哀而憐之特賜保全使得乞身而去不勝幸甚此志已決仰冀聽從臣無任祈懇之至

御筆

不可自疑有駭衆聽已令宣押當體朕懷

三乞罷知樞密院事劄子

臣猥以凡材誤蒙異恩擢用樞筦籌畫無取料敵不明致令种師中姚古之師為金人潰敗太原圍急未知所以解救之方又臣嘗遣張師正統領勝捷人兵前去策應不謂師中即以師正充選鋒賊馬邀截先次奔北既乏知人之明又無捍患之略豈可貪冒寵榮尚居宥密

之地以塞賢路祖宗舊制邊事失律必罷樞臣伏望聖
慈重賜黜責以允公議臣不勝皇懼待罪之至

御筆

早來已與卿面論不須如此令封還所奏勿復再請

第二劄子

臣伏蒙聖慈以臣上章緣种師中軍行失利乞賜罷黜
特降御批開諭不允仰戴天恩第深感懼竊以樞筦本
兵之地專任邊事與他宰執責任不同敗師蹶將咎將

誰執況有祖宗之成憲所當遵依伏望矜憐特賜斥免
以副公議兼臣才術空疎志氣凋落誠不足以上副委
寄不勝惶恐待罪激切之至

御筆

依已降指揮不允仍止來奏

梁谿集卷四十六

欽定四庫全書

梁谿集卷四十七

宋 李綱 撰

表劄奏議九

附御筆批荅

辭免河北河東路宣撫使劄子

第二劄子

親筆宣諭請行

第三劄子

第四劄子

第五劄子

第六劄子

第七劄子

第八劄子

親筆宣諭節賜裴度傳

謝賜裴度傳劄子

第二劄子

乞罷宣撫使待罪劄子

第二劄子

第三劄子

第四劄子

第五劄子

親筆宣諭三首

辭免河北河東路宣撫使劄子

靖康元年五月
种師道以疾乞

罷宣撫使有旨以公代師道
宣撫使河北河東上劄辭免

臣伏蒙聖慈特降宸翰河北河東國家根本之地委令
宣撫臣以孤生誤蒙天恩自庶僚中擢任樞筦以死報
國此志已定况當危難之秋主辱臣死乃分之宜但今
日此舉繫國安危种師中以宿將統重兵以援太原不
旋踵而潰散臣獨何人敢任此責又种師道威望素隆
見為宣撫若罷師道而授臣恐外議不以為當區區微
軀誠不足惜懼誤國事儻陛下必欲使之亦何敢辭調

兵選將應副錢糧須旬月始辦太原圍久王師旣劬深可寒心臣慮此數日間已難守矣適見布衣高世兼奏狀謹繳進更容來早稟受聖訓謹具奏知

御筆

如師道不罷亦不妨事便可治行

此任無易卿者為朕建功切在審而後行不可輕接戰

第二劄子

臣伏奉御批以臣辭免宣撫使除命特加訓諭此任無以易卿者竊念臣自遭遇以來惟知竭忠盡力以圖報效而橫罹謗議皆出意外累嘗乞身未蒙俞允且使待罪樞筦仰承睿算尚可黽勉若令宣撫兩路將兵於外豈臣孤危乃敢出此伏望賜照察餘俟面奏

御筆

朕志已定須當卿去不允所乞

親筆宣諭請行

卿素忠義何故不欲去適覽章奏太原府出人五百
斫賊數十級以此見之尚可為卿何不奮然請行以
成功名可體茲意

第三劄子

臣伏奉宸翰令具有名望武臣契勘方今有名望武臣
無如种師道者雖老其智謀猶足用旦夕入覲以優禮
待之必肯為陛下用以李彌大副之朝廷已為得人所
有臣今來除命伏望聖慈特賜寢罷

御筆

不允所乞國方多難不可辭

第四劄子

臣適方具劄子辭免恩命復蒙聖慈特降親筆手詔令與師道同行勿復有辭者臣之區區已具此奏伏望睿察追寢成命無任祈懇之至

御筆

不允所奏

第五劄子

臣伏奉聖慈以臣累具劄子乞免宣撫使除命復降御批朕志已定須當卿去不允所乞國方多難不可辭者竊念臣爰自變故以來奮不顧身以徇國家未嘗輒敢辭難蓋荷陛下知遇得以少效孤忠今日師中挫衄內外惴恐此誠多難之時捐軀報國實臣素志豈復當辭但陳力就列不能者止臣內揆縣薄實難勉強而况遭罹讒謗動輒得咎積憂成疾心力殫耗豈敢以孤危之

蹤乃輒當統帥之任伏望特加睿察寢罷此除更俟來
日面奏

御筆

成命已行必無改易卿當為國立功不得辭免

第六劄子

臣伏蒙聖慈特降親筆除臣宣撫兩路應大小事一委
便宜施行不從中制但責成功亦不求速者仰荷委寄
之重敢不奉承睿旨然臣適見河間帥臣奏報賊馬侵

犯雄州安肅軍一帶乞差兵三五萬人前來防把又見姚古奏報陳迪郝懷下把南北關人兵並皆潰散乞添差兵把截事勢已急與其令臣作宣撫使統兵二萬前往滑州所費不貲曷若各分萬人犒設訖往河北沿邊及河東把截以濟一時之急所有河北制置使只就委劉韜於事為便其种師道乞加優禮或留京師或歸屯所乞自聖裁臣非為身謀但欲措置常理以濟國事伏望聰察謹具奏知

御筆

卿宣撫兩路此等事可一面施行劉韜事令三省降
旨師道已留京師

第七劄子

臣伏蒙聖慈以臣辭免宣撫使新命并乞罷樞密院職
事守本官致仕符降中使封回劄子賜御批不允臣仰
荷天恩第深感涕實以宣撫樞密之職於今尤為重任
而臣材術淺薄中遭讒謗難以冒居非為身謀蓋恐誤

國伏望察臣忱誠特從所請遴擇信臣付以重任天下幸甚臣見以眼疾在假俟稍痊安當求對次干冒天威無任戰汗之至

御筆

卿昨日已受命豈得再辭河北河東實繫宗社卿宥密信臣朕所委寄便當來日受勅此志決定卿切體之

第八劄子

臣昨晚對睿思殿竊見陛下緣邊事焦勞至於感慟臣子之情不遑寧處是以未敢固辭今來除命退伏惟念任重力薄恐辜委寄誠難勉彊臣本書生素不知兵昨於艱難之初蒙陛下任使輒當兵事蓋緣圍城之中事出倉卒無緣號召天下賢才故徒以區區之忠遂應誤選賊騎既退又蒙擢置樞筦求去不遂既已負非才之責矣然因天下獻言而用其智謀上稟睿訓旁資同列議論得暫承乏於此今者忽蒙擢為大帥使之出將於

外非所克堪中夜驚惕此必有建議不容臣於朝者況自頃以來橫罹謗議或以為狂率或指為姦佞其甚者至以為收人心而又上煩宸翰有威福專權之語今咫尺天威日在左右得謗尚如此而況使將重兵遠去闕廷乎臣區區一身誠不足惜深恐上誤國事雖陛下復欲保全勢不可得伏望聖慈更賜詳察特與寢罷成命仍許臣解樞密院職事守本官致仕退歸田廬無任皇懼待罪之至

御筆

朕面諭已至誠意切當體國受命必無回命之理
親筆宣諭節賜裴度傳

節出裴度傳一段令直筆錄賜卿忠義徇國何愧前
人佇觀成效以寬朕憂

謝賜裴度傳劄子

上令直筆錄裴度傳降賜具
劄子稱謝且錄裴度論元稹

魏洪簡章
疏上進

臣伏蒙聖慈除臣河北河東路宣撫使累具劄子辭免

欽定四庫全書

梁簡集
卷之四

八

未蒙俞允又被宸翰過有褒語并賜臣裴度傳仰荷委
任之重顧臣何人可以當此竊以祖宗積累垂二百年
河北河東最為根本之地金人乘虛兩路並入自河北
入者既已侵犯都畿厚載而歸矣而近者雄州奏報不
待涼秋已復犯塞自河東入者破忻代以圍太原行將
半年未有解圍之意宿將重兵數路應援悉皆潰散校
之吳元濟區區以蔡州數城之地為唐室患固不相侔
而環蔡諸節度之兵與今日士馬其強弱又不可同日

而語而臣徒抱孤忠才術疎短曾不足以望裴度萬分之一陛下以艱難乏才之故誤有使令以度況臣實謂非倫非特未允公議且恐有誤國事伏望睿明於在廷之臣精加選擇付之重寄庶幾成功仰副陛下北顧焦勞之意天下幸甚

御筆

已除卿宣撫便當受命

第二劄子

臣竊見諸葛亮出師表其言明於治體以謂親賢臣遠小人此先漢所以興隆也親小人遠賢臣此後漢所以傾頽也夫君子小人於用兵之際似不相及而亮深以為言者誠以寇攘外患有可以掃除之理而小人在朝蠹害本根浸長難去其患有不可勝言者是以吉甫贊周王以北伐必有孝友之張仲裴度相唐宗以東討必去姦邪之元稹用能成功焜耀圖史君子小人之不兩立從古已然臣竊觀陛下嗣位之初適遭金人入寇宵旰

憂勤勵精圖治思刷前恥雖古帝王勤儉之極無以遠
過然君子小人尚猶混淆於朝翕訛成風殊未退聽謂
宜留神照察在於攘逐戎狄之先朝廷既正君子道長
則所以捍禦外患者有不難也今取裴度論元稹魏洪
簡章疏節其要語輒塵天聽不勝戰汗之至

御筆

覽卿所奏銘記於懷但為國了事與卿共太平之樂

乙罷宣撫使待罪劄子

既受宣撫使命以軍馬未辦董展行日御批遷

延不去豈非拒命上劄
子待罪及繳納告敕

臣伏奉宸翰謂臣受命月餘遷延不去豈非拒命者伏
讀震慄不知所措契勘臣於前月二十三日受敕至今
纔二十日當時蒙御批用太史局擇定今月二十二日
啟行臣以庶事未辦嘗具回奏乞展三日此乃恐事有
未備上累國體非敢遷延今蒙聖訓以為拒命臣無任
惶懼待罪之至伏望聖慈特賜寬宥

御筆

封還卿奏不須如此依定日二十五日內起發

第二劄子

臣嘗具劄子以奉御批謂臣遷延不行豈非拒命伏讀
殞涕惶懼待罪乞賜竄責未奉指揮伏念臣本以書生
遭遇盛際常願奮身效命以報聖知自受宣撫職任以
來夙夜憂惕懼不克任辟置官吏選用將佐團結隊伍
關請器甲措置錢糧雇買車馬種種軍需皆創建非
若童貫譚稹諸事熟成上下應副咄嗟可辦而陛下督

責之峻猶未及元選定出師之日便謂臣遷延拒命不行竊恐聖慮有所未亮也臣前備員守禦使司激賞探報使臣已蒙宸翰謂其專權今承乏宣撫使司治行量展日限又蒙御批謂其拒命專權拒命者臣子之大惡有一於此罪不容誅陛下方臨遣大帥震揚國威捍疆敵解重圍而以專權拒命之人充其選無乃不可乎臣聞軍旅之事非任之專信之篤者不可以成功臣日在陛下左右咫尺陛下猶且聖訓如此況行師於千里之

外謗黷交興上惑睿聽陛下果能諒其區區之忠乎與
其進無所成有誤國事不若知難而退甘受竄誅伏望
聖慈罷臣知樞密院事河北河東路宣撫使重賜黜責
以正典刑選命信臣委以重任臣見居家待罪無任祈
天俟命惶懼戰越之至

御筆

豈須如此止欲卿速行今封還卿奏

第三劄子

臣伏蒙聖慈以臣累具劄子待罪乞罷知樞密院事并宣撫使職事特降親筆封還所上章感戴恩德彌深震恐竊念臣智識淺短學術迂疎獨於義命之際素知自信曩者遷謫七年退伏田里不知貧賤之可羞竭來中都適遭陛下龍飛特被眷獎致身樞輔不知富貴之可樂徒以上荷天恩未能報稱故雖屢求去位終亦未果今孤危之跡讒毀交興罪狀日聞致煩宸翰屢有訓勅今復有拒命之語退自循省莫知所以良自傷悼夫欲

效區區之忠者臣之志也至於成功則有非人之所能
為者豈可必哉宣撫兩路人臣重任事有至難自非陞
下不致毫髮之疑於胸中安能有濟臣竊觀聖聽不能
無惑於羣言日侍清光尚難自處而况可使之統重兵
於千里之外哉此臣所以日夜憂懼而不得不辭也伏
望聖慈憐臣於艱難之秋嘗效犬馬之力特賜保全解
其職任使遂退休則圖報大恩當期異日所有臣昨蒙
除尚書右丞知樞密院事宣撫使等告勅謹具繳進乞

此骸骨歸於山林臣無任干冒天威惶懼戰越俟死之至

御筆

何故如此方朕委付兩邊事俟卿前去措置所有告
敕封還不得更有陳請並無毫髮之疑止要促卿速
行

第四劄子

臣伏蒙聖慈以臣待罪乞罷知樞密院事河北河東路

宣撫使重賜黜責特賜御批封還劄子仰荷天恩尤增
感懼重念臣小才無取罪狀已多與其他日受誤國之
誅不若自歸於司寇伏望睿斷特正典刑所有宣撫使
職事乞早差官交割管構臣無任惶懼戰灼之至

御筆

封還所奏

第五劄子

臣契勘宣撫司已漸就緒錢物之類並未曾支動伏望

聖慈選差宰執代臣使事竊見徐處仁唐恪朝之老成
累任帥臣諳練兵事可以充使如陛下不欲遣之於外
但以使事委之且留京師令統制官等分領將卒前去
劉韜解潛處使喚以宣撫司錢物應副自足辦事更乞
聖裁臣未敢搬出見在府第待罪聽候指揮

親筆宣諭三首

宣諭累百章不允辭免

卿所請雖累百章不允可疾速辦行起發

宣諭疾速辦行


朕無纖芥所懷止欲激卿速行不須如此決不允從疾速辦行夜來所批督卿速行今推托如此何望焉

宣諭陳奏請行

河東兵民日望宣撫到彼朕批語激卿欲行

所有元批旨封

實不期卿誤聽累乞退閒朕昨日進退疑惑甚難出手欲全君臣之義垂之萬世今日見卿陳奏慨然請行釋去疑念足見忠義之誠久而益堅朕甚嘉之



梁谿集卷四十七

欽定四庫全書

集部

梁谿集卷

四十八至
五十二

詳校官庶吉士_臣張溥

侍讀_臣孫球覆勘

總校官知縣_臣楊懋珩
校對官中書_臣潘奕雋

謄錄監生_臣陳太初

欽定四庫全書

梁谿集卷四十八

宋 李綱 撰

表劄奏議十

親筆宣諭不須與三省議

論宣撫職事劄子

第二劄子

第三劄子

第四劄子

親筆宣諭三省

謝賜御筵表

謝降賜王束帶等表
謝賜鞍馬表

謝瓊林苑賜御筵表
親筆宣諭途中將護

親筆手詔

謝宣撫河北河東降親筆手詔表

乞深考祖宗之法劄子

親筆宣諭覽所上章陳祖宗之法

論不可遣罷防秋人兵劄子

第二劄子

親筆宣諭不須與三省議

路允迪等卹其家甚善益見徇國勤勞之意卿行不
須與三省議此事已決何必如此凡事斷而可成再
三反復愈亂人意卿可一心措置備辦成功之後與
卿共享太平之樂

論宣撫職事劄子

累具辭免不獲將以六月二十五日出師上劄

臣伏蒙睿訓卿行不須與三省議此事已決再三反復
愈亂人意者仰荷委寄之重第深感涕臣旣已拜命受

兵促裝整駕豈復有可回之理見危致命臣子常分亦無足道但國家之事中外一體同心一德乃克有濟今陛下遣臣獨出聖斷臣不量才而受任二三大臣不以為然使他日果能支梧則已稍有疎虞仰累陛下知人之明此臣所以夙夜震懼而不自安也更望聖慈博盡大臣之謀使臣既行之後無沮難無謗譏無錢糧不足之患則進而死敵以報天恩實臣區區素願死且不朽冒昧自列無任戰汗之至

第二劄子

臣伏蒙宸翰卿出師今論已定者仰荷委任之重第深感懼然茲事體大繫國安危非臣一人所可獨任其責
宰執間議論尚有不同者徒迫天威罷師道而遣臣觀
昨日之所評議與今日之所施行其意可見伏望聖慈
更盡大臣之謀使人無異辭同任成敗他日或少有差
跌不獨臣受誤國之誅豈勝幸甚至於以身徇國進而
死敵則臣之素志也夫復何說以辭

第三劄子

臣契勘童貫以樞臣為宣撫使踰二十年所握者皆關
陝之精兵西討夏賊南殄方寇北攻燕雲喪失師徒無
慮數十萬遂使國家兵勢削弱以至今日有敵國憑陵
之禍然貫一將蒙上皇信任之專武臣將帥皆出其門
內帑供給不可勝計置平貨場等以幹萬貨之低昂豐
財足以養士厚賂足以弭敵故雖行師用軍無有紀律
久而後敗今臣受任於國家艱危之秋姚种二帥軍馬

潰散之後哀疲劣久不訓練之兵以抗強敵率烏合素
不拊循之將士以邀成功甚矣其責重而且難也惟有
一策不愛金幣以養士而作其氣庶幾可為而今之宣
撫使司悉仰給於朝廷府庫空虛無以給予前日乞一
百萬纔實得二十萬已有難辦之論不知何以使臣率
勵將士支梧兩路而寬陛下北顧之憂也陛下謂臣忠
義感激奮不顧身則可謂臣諳練兵事果能成功則不
可夫以兵弱財匱之時而欲徇國家之急以捍屢勝驕

暴之敵雖三尺之童亦知其難更望陛下與二三大臣
深計而熟慮之異時無謂臣輕率敢往而不顧國家之
大計也議者又謂臣建守三鎮之策今日之事臣當任
其責是大不然三鎮者祖宗陛下之三鎮果能守則當
與天下共守之如必使建議者任其責則後誰敢為陛
下納忠者更望聖慈與宰執商議審處令各為奏明言
遣臣之利害是非如何激勵士卒如何應副錢糧屯泊
當於何處戰守當用何策斷自睿意使臣得遵稟而行

不致誤事非獨臣之幸也實天下之幸也

第四劄子

臣昨自陛下龍飛臨御海寓臣以非材特蒙獎擢自庶僚不旬日而叅大政遂獲待罪樞府深惟遭遇之異竊自感勵思欲罄竭以圖報效而材疎智短終未能少收尺寸之功內負慙惕夙夜靡遑茲者伏蒙陛下委以河北河東兩路重寄臣自視闕然恐不足以仰承委付之意至於不避煩黷力祈罷免而眷屬之厚不容退避見

危致命豈敢固辭深惟國事之大非小己私智所能獨
辦今其將行願受睿算與廟堂之成謀使臣得以遵稟
奉行庶幾有濟夫用兵之道雖臨機制變不可預計然
規摹大略當須先定今日之事莫大於防秋莫急於解
太原之圍士大夫之獻說者不過和與戰二策而已金
人留吾親王宰相以為質屯重兵於太原已半年矣使
者旁午冠蓋相望而欲得三鎮之意愈堅和果可恃乎
种師中姚古以十萬之師相繼潰散戰果可必勝乎和

不可恃則秋高馬肥賊騎侵軟議者必以臣今日出師
為致寇之端戰不可必勝則萬一將士或復有小劔必
又以臣為輕舉誤國不知陛下睿算與夫廟堂之謀所
以授臣使防秋而解太原之圍者當決以何策而可也
前日和議割三鎮之失至今為梗今日之謀倘或更有
差誤則天下之勢有不可勝慮者矣願陛下及臣之在
廷與五六大臣熟議決策特降親筆俾臣遵行臣非敢
愛死誠恐有誤國家大計故敢冒昧言之仰黷天威伏

深戰慄

親筆宣諭三首

宣諭不責速進

應河北河東並便宜施行不可深進或少衄亦不罪
捷到亦不為喜但堅固期於全三鎮是朕之意卿宜
體此不責速進但款曲圖之庶保萬全

宣諭一切便宜行事

朕信任卿堅如金石應一行事朝廷豈能預先定得

卿可一切便宜施行

宣諭所到如親行

李綱所到如朕親行

謝賜御筵表

臣某言伏蒙聖慈以臣差充河北河東路宣撫使啟行
有日特賜臣御筵者授鉞將壇謬總六師之寄肆筵宸

禁猥煩八簋之陳詔語春溫威顏天邇

中謝

伏念臣奮

身寒苦逢世亨嘉祿仰斗升粗識素餐之恥腹諳藜藿

初無肉食之謀自筦樞機空糜廩庾適犬戎之犯順騎
遠并門驅虎士以遄征軍連代北憫其行役錫以宴娛
仍詔佩橐之臣以示加遷之寵釘繁列宿繫鐸帶之內
盼光奪流霞灩玉舟而親勸驩騰剖曲榮絕典彛此蓋
伏遇皇帝陛下俎豆豪英帡幪輔弼大亨以養躬節儉
以旁招小雅之詩政修攘而不廢已侈百朋之錫詎言
三爵之過臣敢不仰懷推食之仁力刷飲河之恥取羊
豕執俘而獻馘期熊羆飲至以策勲守祖宗之故疆誓

不輕於赤壤上君王之萬壽行入賀於紫宸

謝降賜玉束帶等表

臣某言伏蒙聖慈以臣差充河北河東路宣撫使啟行
有日特降中使賜臣玉束帶一條撚金線小花紫戰袍
一領金笏頭帶一條魚袋全牙簡一面綠袋金銀五百
兩絹五百匹細物一百匹揀芽小龍茶三千鈔椽燭五
十條刀劍六口人馬甲一副金鍍銀鐺椅槍一條花角
弓一張箭三十隻烏銀犀皮鞘劍一口者總戎兩部曾

未嘗於國威申錫百朋已繆承於天寵轅門改觀帥幄
生輝荷優賤之有加揣虛庸而失措

中謝

竊以先王盟

府之法賞必示功大臣服與之宜德惟稱物凡此焜煌
之數當酬瑰偉之勲慨念臣愚早逢主聖蔑著銖分之
效敢懷錫予之貪屬小醜之未平曾大邦之敢拒猥膺
推轂獲與登壇才乏西平幣仍豐於異錦德非裴度帶
有過於通犀衣以珍袍副之古簡琕戈寶劒俾執銳以
輸忠鳳翔蘭橐期通宵而盡瘁丁寧示眷偃樓銜恩此

蓋伏遇皇帝陛下躬上聖之資濟中興之業力排羣議
獨奮睿謀脫三鎮於虎狼拯兆民於塗炭天聲震疊國
勢救寧察臣早與於邊機故此俾宣於廟算憫其行役
被以寵靈臣敢不肅整勝兵大摧驕寇期無南下之牧
仰寬北顧之憂

謝賜鞍馬表

臣某言伏蒙聖恩特降中使賜臣馬二疋金鍍銀間裝
紫繡鞍轡一副烏銀裝著鞍一副者使命來臨天威在

望申遣左璫之重載頒內廐之良佩服恩榮祇深慚懼

中謝

恭惟皇帝陛下端一心而觀萬化操八柄以馭羣臣念其驅馳之勞錫以便蕃之寵壯元戎之十乘解左服之兩驂偉然神駿之姿被以連錢之飾臣敢不仰承睿眷俯罄愚忠誓不與賊以偕存顧雖捐軀而何惜餘齡尚壯雖無據鞍矍鑠之姿將命不愆或遂攬轡澄清之志

謝瓊林苑賜御筵表

臣某言伏蒙聖恩以臣今月二十五日總師出門特差翰林學士吳玠就瓊林苑押賜御筵者寵靈下逮已霑零露之恩宴衍俯臨再被需雲之渥載惟僥冒第劇戰兢

中謝

伏念臣社櫟散材康瓠小器力學粗知於忠義

逢時竊意於功名適丁艱難猥叨任使超居丞轄曾固著於休功繼掌樞衡迄幾聞於善狀自惟迂拙每丐退藏未容乞身而歸更與登壇之選雖忠誠之備寫終天意之莫回禮遇彌加褒榮浸侈初賜宴於中禁復申犒

於上林天厨具絡繹之珍樂府備鏗鏘之奏雍容和氣
感激懦衷下及羣僚亦與榮觀顧寵嘉之莫擬撫羈賤
以何堪此蓋伏遇皇帝陛下以道觀能使臣以禮推食
慕漢高之烈脫袍有藝祖之風致此鯁生亦膺異數臣
敢不力修軍政大振國威獻北闕之俘願希蹤於前世
卻南牧之騎期無媿於古人

親筆宣諭途中將護

數日不見卿良深引望途中勞神不易太原重事委

任於卿更宜將慎用副朕懷

親筆手詔

敕李綱卿以鴻樞之柄總元帥之權方庚伏之屆時
眷遐薄之勤止載惟忠蓋深所歎嘉顧邊警之未寧
繫壯猷之是賴以卿舉措為國安危欲見威而銷萌
宜持重以制勝往思必慎務決萬全卿其勉圖朕所
傾竚夏熟卿比平安好遣書指不多及

謝宣撫河北河東降親筆手詔表

臣某言今月二十八日伏蒙親筆手詔一道以臣宣撫河北河東兩路特賜撫諭者跪辭丹陛方違咫尺之威捧誦紫泥遽奉丁寧之訓洪惟德意仰見天心

中謝

伏

念臣學淺而術迂德輕而援寡驟蒙睿獎超執事機方強敵蕃銳於晉疆而宴寇拏兵於朔部長蛇封豕肆毒吾民鋒蝟斧螳扞天討屬聖神之在念宜俊彥之旁求猥及非才俾專大計實安危之所繫顧舉措之敢輕負責良深撫躬知畏伏惟皇帝陛下廓至明而在位攬

長轡以馭臣任用者必責其有成訓迪者必規其所弊
慮臣輕於料敵故申持重之言以臣勇於赴功故有必
慎之誠乃形一札以取萬全臣敢不上體淵衷仰循聖詔
遵仁聖之秘略參以並行體魏武之新書動以從事

乞深考祖宗之法劄子

靖康元年七月初總師
道出鞏洛望拜陵寢上

劄子乞深考祖宗之
法進君子退小人

臣總師道出鞏洛望拜陵寢潛然涕流恭惟祖宗創業
守成垂二百年聖聖傳受以至陛下適丁艱難之秋戎

狄內侵中國勢弱此誠陛下嘗膽思報勵精求治之日
伏望聖慈深考祖宗之法一一推行之進君子退小人
無以利口善譎言為足使益固邦本以圖中興上以慰
安九廟之靈下以為億兆蒼生之所依賴天下不勝幸
甚臣忘生觸死冒進狂言不勝戰越待罪之至

親筆宣諭覽所上章陳祖宗之法

覽所上章陳深考祖宗之等事足見忠義愛君之心
當一一銘記於懷

論不可遣罷防秋人兵劄子

靖康元年四月公在密院乃與許翰

條具調發防秋之兵至七月公已出宣撫朝廷降旨詔書所起之兵罷去大半公上疏力爭

臣昨待罪樞府伏蒙陛下委令措置防秋人兵臣意以謂中國軍政不修幾三十年矣闕額不補者過半其見存者皆潰散之餘不習戰陳故令金人得以窺伺既陷燕山長驅中原遂犯畿甸來無藩籬之固去無邀擊之威廟堂失策使之割三鎮質親王劫取金帛以億萬計

驅掠士女屠戮良民不可勝數誓書之言所不忍聞此誠宗社之羞而陛下嘗膽而思報者也今河北之寇雖退而中山河間之地不割賊馬出沒並邊諸郡寨柵相連及不少休太原之圍未解而河東之勢危甚旁近縣鎮皆為賊之所占據秋高馬肥敵騎憑陵決須深入以責三鎮之約及金帛之餘數儻非起天下之兵聚天下之力解圍太原防托河北則必復有今春之警宗社安危殆未可知故臣輒不自揆為陛下措畫降詔書以團

結諸路防秋之兵大約不過十餘萬人而欲分布河北沿邊雄霸等二十餘郡中山河間真定大名橫海五帥府腹裏十餘州軍沿河一帶控扼地方翊衛王室隄防海道其甚急者解圍太原收復忻代以捍金人夏人連兵入寇不知此十數萬之衆一一皆到果能足用而無賊馬渡河之警乎今臣被命出使去清光之日未幾朝廷已盡改前日詔書調兵防秋之計旣罷峒丁又罷刀弩手又罷土兵又罷四川福建廣南東路將兵又罷荆

湖南北路係將不係將兵而京西州郡又皆特免起發
是前日詔書所團結之兵罷去大半不知金人聚兵兩
路入寇將何以支梧而朝廷何恃不留意於此也臣竊
思之以兵為不須起者大概有五川廣福建荆湖之地
遠一也錢糧犒賞之費多二也河北寇退天下已無事
三也太原之圍賊馬不多不攻自解四也探報有林牙
高麗之師金人牽制未必深入五也若以川廣福建荆
湖之地遠則詔書之下以四月期天下兵以七月當時

關報三省何不即止今已七月遠方之兵皆已在道始復約回是復蹈今春勤王之師約回之弊也一歲兩起天下之兵中道而兩止之天下謂何臣恐朝廷自此不復能取信四海而將士解體矣國之大事在戎宗社安危所繫而且行且止有同兒戲臣竊痛之若以謂錢糧犒賞多則今春無兵捍寇致令誤國土地寶貨人民皆為所取今惜小費又不為之備臣恐後來所取又不止於前日也况元降指揮防秋人兵各令賣糧以行則錢

糧犒賞之乏自非所患廟堂不深思宗社大計而惜小費臣竊所不取也若以河北寇退天下無事則邊郡日報金人聚兵聲言某月入寇當取其地強敵臨境非和非戰朝夕恐懼其復來天下果無事乎賈誼謂厝火積薪之下而坐其上火未及然因謂之安以今日觀之何止於火未及然殆處於烈焰之旁而言笑自若也若以謂太原之圍賊馬不多不攻自解則自春徂秋攻守半年曾不能得其實數姚种二帥以十萬之師一日皆

潰彼未嘗有所傷軀不知何以必其兵之不多以為可
以不攻而自解者臣以為非愚則誣至於林牙高麗牽
制之報理或有之然不可恃彼之不來當時我之有備
則屯兵聚糧正今日之先務不可忽也今河北河東州
郡日告危急乞兵皆以三五萬為言而半年以來未有
一人一騎可以副其求者防秋之兵甫集又皆遣罷不
知此何理也若必以謂不須動天下之兵而自可無事
則臣誠不足以任此責陛下胡不遣建議之人代臣坐

致康平而重為此擾擾也除范世雄所統湖北兵聞已至襄唐間臣已作奉聖旨令疾速發赴宣撫司外所有餘路乞依元降詔書起發庶幾不誤國事

第二劄子

近降指揮減罷防秋之兵臣所以深惜此事者一則河北防秋闕人恐有疎虞二則一歲之間再令起兵又再止之恐無以示四方大信防秋之計臣前奏論之已詳請為陛下更論不可失信之意者周為犬戎所侵嘗以

烽火召諸侯兵恐諸侯之未必至也舉烽以試之諸侯之兵大集知其試已皆怒而歸其後真舉烽無復至者去冬金人將犯闕詔起勤王之師遠方之兵踴躍赴難至中途而寇已和有詔止之皆憤惋而反今以防秋之故又起天下之兵良非獲已遠方之兵率皆就道又復約回將士卒伍寧不解體夫以軍法勒諸路起兵而以寸紙罷之臣恐後時有所號召無復應者矣

梁谿集卷四十八